

SAN PABLO KARTA NYAFXTE FXI'JNI TESALONIKA ÇXHABTEWE'SX JÏI

Tesalónika çxhabte Dxus yakh fxi'zesawe'sxtxi Pablowe'sx fxi'jni

1 ¹Pablo yaasesa naa karta's fxi'jaçthu Silwano vxite' Timoteo txäawe'sx yakh, yakhthê'jwe'sx Tesalónika çxhabte pkhaakhena üssawe'sxtxi weçxana. I'kwe'sxa' Dxus kwe'sx Tata vxite' kwe'sxtxi jxpe'jsa Jesukristo txäawe'sx yakh txutemée wala ew fxi'zena üsi'kwe. I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristo, txäa pa'ga Dxus yakhçxáa mfxi'zewe.

Tesalonikatewe'sx Dxus yakh fxi'zewa'ja's kaavxya'ja'jni

²I'kwe'sx jxukaysa txä'wē ew fxi'zepa'ga Dxusa'stha'w weçxana puutx we'we' i'kwe'sxtxi peçxkanamée neewe'wena. ³Txä'wē i'kwe'sx pa'gate Dxus kwe'sx Tata yakh puutx we'weççxa', na'wē i'kwe'sxa' Dxus yuuçxáana yajkxna i'kwe txajx jxkaahni's mjī', sa' txä'wēy wala peeygāhna selpīi i'kwe kwe'sxtxi jxpe'jsa Jesukristoçxá's üythasna txāa yakh txutemée. Txäatxtha'w bagaçxtewa peçxkanamée Dxus dxi'pte neewe'we'. ⁴Kwe'sxa' jiitha'w Dxusa' yakhthê'jwe'sxtxi peeygāhçxa txhitxhku nwe'weya'. ⁵Aça' kwe'sxa' Dxus yuwe nwe'wewa'jsa's pta'sxiççxa' yuwejuçxáa we'wemeetha'w, wejxwa pta'sxwa'ja's Dxus Espiritu pu'çxte', txä' i'sxiinimeena sühnatha'w pta'sx. I'kwe'sxa' peekx jii i'kwe ma'wē pta'sxçxa', kwe'sxíi yuuwa txä'wēytha'w yūuna fxi'ze i'kwe'sx yakh üççxa'. ⁶I'kwe'sxa' kwe'sx fxi'zeni vxite' Jesukristo fxi'zenitx thegçxa txāa na'wēyi'kwe fxi'ze makwe wala açeçtewa, Dxus yuwe's Dxus Espiritu üste' wala weçxana jxpa'gaçxa. ⁷I'kwe'sx txä'wē yūupa'gatx vxite kiwe Macedonia Akayasuwe'sx Dxus luuçx jxukaysa kwe'sxwa txä'wēy fxi'zega sühwa'ja's ji'phu. ⁸I'kwe'sx txä'wē yūuni

yakhi'kwe Jesukristo kaapiya'jni's Macedonia Akaya kiwesuçxáamée, msuu msuwa jxuka kaajiyu'j, txáa pa'gak i'kwe'sxa' Dxusa's yaakxsatewa ya'jjiyu', açá' açxha' kwe'sxa' i'kwe'sx ew fxi'zeni's tuuthe'jwa'j ji'phmeeyá'tha'w. ⁹I'kwe'sx ew fxi'zeni's kwe'sx pta'sxipkaçxte, wejxwa txáawe'sx khuê'ytxi pta'sxi' ma'wêne'kwe kwe'sxtxi ew jxpa'ga txá'sna, sa' ma'wêne'kwe Dxus ítiximeesatx nvxihtçxa Dxus ítixisa's selpiiya' yaaki'. ¹⁰Sa' açxha' ma'wê úyhasna úskwe Jesus Dxus Nçxi'k uuniijüwa ítixi yuuçxa cieluju ki' sxawedwa'ja's txá'snatx pta'sxi'. Txáa Jesusa' Dxus kastigo seena'ju nwe'wewa'jsa'.

Tesalonikate Pablo mjïina úsni

2 ¹Yakhthê'jwe'sx, i'kwe'sxíwa jii i'kwe kwe'sx i'kwe'sx tasxte pa'jni' kxul yuume'. ²Nyafxí yu' txakwe wala wéesxuna pkxuunitha'w yuu Fxilipos çxhabte txá'sa' jii i'kwe. Nawa Dxusa' pu'çxku txajx yuwe ewte nvxiitwa'jsa's açesa ksxavxyte úukhmée pta'sxkahn. ³Txáa pa'gatey kwe'sxa' jxpubaçxa pta'sxna úsu'çmeetha'w, sa' ewmée yajkçxa íxiina úsu'çmeetha'w. ⁴Txá'wêmeetefík Dxusa' txajx yuwe ewte nvxiitwa'jsa's kwe'sxtxi neewe'weçxa nvxiht, kxahtha'w txá'wê pta'sx. Naa kiwete nasatx weçxaa jxthâasçxa txá'wê yu'çmeetha'w, wejxwa Dxus kwe'sx úustxi jiisa weçxakahntha'w txá'wê yû'. ⁵I'kwe'sxa' jii i'kwe kwe'sxa' bagaçxte yuhwa txá'wê nasatx yu'kxwe'wena úsu'çmeetha'w, sa' vxyuu knayya' sühçxawa txá'wê úsu'çmeetha'w. Dxusa' jiia'. ⁶Bagaçxte yuhwa nasa txá'wê kwe'sxtxi ew we'wena tuuthe'j jxthâasnawa u'ju'çmeetha'w. I'kwe'sxtxi vxitesatx maa yuhtxwa txá'wê jxthâasmeetha'w. Sa' txá'wê i'kwe'sxtxi juuna' we'weçxa kíhçxáawa thâas wéewaça', ájawa'jne'tka'w yu', Jesukristo jxkaahnisatha'w yu' naa pa'ga. ⁷Txá'wê yúupkaçxte, i'kwe'sxtxi ewkuêçxáatha'w we'we, luuçx nji'jwa ma'wêga ewkuê jxpe'jna nuywalá' txá'wê. ⁸I'kwe'sxa' iiméh wala wedxnisai'kwe txáa pa'ga Dxus yuweçxá's úsmée, kwe'sx ítixi fxi'zeni' yuunawa ivxiituwaça' sühtha'w i'kwe'sx pa'gate, i'kwe'sx ew fxi'zeni's jxthâasçxa. ⁹Yakhthê'jwe'sx, yaaki'ne'kwe, kwe'sxa' Dxus yuwe's pta'sxna u'juçxa' ma'wêtkaw çxhâçxha mjï' kwe'sx peejini's uyya', en ma'k yuu meeçxa' kus ma'k yuu nawa mjï'tha'w vxitesatx thâasya'mée.

¹⁰I'kwe'sxa' jii i'kwe, açá' Dxuswa jiia', kwe'sx txá'wê ew zhiçxkwe i'kwe'sx yakh fxi'zeni's, açá' kim yuhwa kwe'sxtxi ewmée nuywe'weya' ájameetxna. ¹¹Jii i'kwe kwe'sxa' ma'wêtkaw i'kwe'sxtxi teeçxsa na'wêçxah kvxiisxa'jn kçxhâaçxha'jna yuu, neywa ma'wêga luuçxtxi jxpe'je' txá'wêtha'w yuu. ¹²Kwe'sxa' wala ew yu'kxpehna neewe'wetha'w Dxus dxi'pte ma'wê fxi'zeçxa txajx jxkaahna úsnite u'kaya' ájawa'ja's.

¹³Dxus yuwe's kwe'sx pta'sxte', nasaa pta'sxniçxáamée, Dxus pta'sxni yuhna sühnai'kwe jxpa'ga, txáa pa'gatha'w kwe'sxa' Dxusa's weçxá' bagaçxtewa. Isa txá' Dxus yuwe yuja', txáasa'íik i'kwe'sx úustxi yu'ptheje'.

14 Yakhthê'jwe'sx, i'kwe'sxa' Judea kiwete Dxus luuçx Kristo Jesus yakh fxi'zesa ũsta' txāawe'sx na'wēyi'kwe yuu. Txāawe'sxtxi' peekx nwe'sxiçxáa wala ahçetx txā'wēy i'kwe'sxwa wala yaaçeni fxi'zei'kwe i'kwe'sx nwe'sxiçxáa. 15 Txāa judiuwe'sxa' kwe'sxtxi jxpe'jsa Jesusa's ikhtxi nyafxíwa ma'wēne'ta ikh Dxus yuwe pta'sxsatx txā'wēy. Txāasatx kwe'sxtxiwa çxhabu kutxi'jna ũsu'. Txāawe'sxa' Dxus dxi'pte ew yūuna ũsmeeta', sa' nasa jxukaysatx açe'tx. 16 Judiu jijmée vxite nasawa ewte neeyūukahn Dxus yuwe's pta'sx wēje'çtewa, ũsu'çmeeta' kwe'sxtxi. Txā'wē yūuçxa txāawe'sx pkaltxi jweeíçxáa nuywalana ũsta', nawa āçxha' Dxus kastigo seena'sa yuja' txā'wē yūupa'ga.

Tesalonikatewe'sxtxi Pablo maz uswa puutx uyya' u'jya' yaakxni

17 Yakhthê'jwe'sx tasxu kwe'sxa' txuteçxa', yafx yakh yu' puutx uymeeçxawa ũuste yu' peçxkanameetha'w i'kwe'sxtxi yajkxna fxi'ze', çma'wēn ki' puutx uyya' u'jwekxtha'w? sūhna. 18 I'kwe'sx tasxna yujxa' yajkxtha'w, sa' adxa' maz uswa txā'wē yuu wēeth. Nawa eçxthê'ja' kwe'sxtxi yupku. 19 Txā'wētewa kwe'sxtxi jxpe'jsa Jesukristo kii ente' i'kwe'sx txā'wē kwe'sxtxi wētewēt çkaaũusuthe'jwa'jsa meema'kwe? 20 Isa i'kwe'sx yuh txā'wē wētewēt kaaũusuthe'jwa'jsa'kwe.

3 1 Txā'wē i'kwe'sxtxi puutx uy wēeçxa wantaimeeçxa, yakhthê'j Timoteoçxá'swa kaath i'kwe'sxtxi thegya', adx yu' Atenaste neeyūuçxa. 2 Txā' Dxusna selpisáa, kwe'sx yakh mjíisa' Kristo yuwe ewsa's pta'sxna, sa' nxuste fxi'zesatx kçxhāaçxha'jna kvxiisxa'jwa'jsak yu', 3 txā'wē kim yuhwa naa nxussa's ũukhna kuh yaakxkahnén. Txā'wēme', i'kwe'sxa' peekx jii i'kwe naa thēyte nxuste fxi'zewa'ja's jxpa'gawa'jsatha'w. 4 Txajíitha'w kxtee i'kwe'sx yakh nee ũsí pta'sx thēyte nxuste fxi'zewa'j en pa'jana jīna txā' kxtey yuuk txā'sa' jxpa'gai'kwe. 5 Txāa pa'gath adxa' i'kwe'sx pxthaa nxusni's peeygāaweete wantaimeeçxa pējxya' kaah Jesukristo yakh ma'wē fxi'zeçtewa jiyuya', txā'wēme' eçxthê'ja' pejka ewmeete kweete'jewáana aça' kwe'sx mjíini' kxul yuuna sūhçxa.

6 Aça' Timoteo' sxawedna pa'kh, sa' Dxus yakh jxpubamée peeygāhna ũsta' jīnak yuwe ewsa jxūna pa'j. Txā'wēçxámée, kwe'sxtxiwa yaaki'tx wala wedxna çbagaçx puutx uyuukxtha'w? jīna, kwe'sxwa ma'wētka'w txāawe'sxtxi puutx uy wēje' txā'wēytxi yaaki' jīnak pta'sxi'. 7 Txāa pa'gatha'w txakwe wala nxuste thēyte fxi'zena ũsçxawa wala weçxá', yakhthê'jwe'sx, i'kwe'sx txā'wē Jesukristo yakh txutemée çxhāçxha fxi'zeni's jiyuçxa. 8 I'kwe'sxa' Jesukristo yakh txutemée fxi'zeni's jiyute', kwe'sx yakha' ũuste iiméh wala wētewēt ũusuthek. 9 Aça' çma'wē yūuçxa Dxusa's iiméh wala weçxaya' ājakxtha'w? i'kwe'sx pa'gate txakwe wala wētewēt-sa's ũuste jxpa'gaçxa'. 10 En ma'k yuu kus ma'k yuu nawa Dxusa's pējxna nestha'w yu', i'kwe'sx yakh puutx uyya' yuupa'ja's ũste', i'kwe'sx nee pejiine'kwe Dxusna jiyuwa'ja's txā'sna kaapiya'ja'nja'w sūhçxa.

¹¹Dxus kwe'sx Tata vxite' kwe'sxtxi jxpe'jsa Jesukristo txãawe'sxa' pejka pu'çxhitxna sÿju'tha'w kwe'sx yujxa' ãjawa'ja's. ¹²I'kwe'sxtxi' Jesukristo' jwee'fiçxáa wala kçxhãaçxha'jana, sa' maatxwa jxukaysatx puutx ya'peeygãawa'ja's ùsuna kwe'sxwa ma'wëtka'w i'kwe'sxtxi peeygãja' txã'wëy. ¹³I'kwe'sx ùuste jxpubamée fxi'zewa'ja's ùsuna, kxah kwe'sxtxi jxpe'jsa Jesukristo txajx nwe'wenisa yakh sxawedna kÿhte', i'kwe'sxa' Dxus dxi'pte yuuwemeesa yuune'kwe.

Na'wë fxi'zeniçxá'sku Dxusa' jxthãasu'

4 ¹Ãçxha' yakthê'jwe'sxtxi wala yu'kxpehna neewe'weçtha'w Jesukristo jxkaahni's: na'wë Dxus dxi'pte ew fxi'zewa'ja's ma'wëtka'w kaapiya'j txã'sa' nvxihtmée, jwee'fiçxáa ew fxi'zena.

²Jesus jxkaathe' kwe'sxa' kaapiya'tha'w txã'sa' i'kwe'sxa' jii i'kwe.

³Dxusa' kÿh pkal yuhwa ji'phmék fxi'ze jxthãasu', ptamumée pkal yũuna fxi'zenijũ jxuka txuteeçxa. ⁴Teeçxsa na'wëçxah peekx nyuutx pkalsu kaafxi'ze'jmée ew zhiçxkwe miipe'jwe. ⁵Dxusna jiimeesa na'wë kazx ewmée yajkxna yu' fxi'zenuwe. ⁶Kim yuhwa vxitee nyuutx pkal yuua'j ji'phmeeta' nmi'a's pesweena. Txã'wëme', Dxusa' seena' yuh wala kastigaína ma'wëtka'w pta'sxi' txã'sa' kxtey yuuna. ⁷Txãa pa'gatey Dxusa' pa'yak nawa txajx dxi'pte kÿh pkal yuhwa ji'phmée fxi'zekahnku txã'wë yũ. ⁸Txã'wë maawa na'wë ew kaapiya'jni's nwëese'jsame' kaapiya'jsa's nwëese'jsamée yu'çme'; Dxus txajx Espiritu's ùssa'sku nwëese'jsamée yu'.

⁹Yakthê'j pwe'sx puutx ya'peeygãawa'ja's pta'sxna fxi'jwa'j ji'phmeeth, txãa pa'gatey Dxusa' kaapiya'jyã'kh teeçxsa na'wëçxah puutx ya'peeygãawa'ja's. ¹⁰Txãa pa'gai'kwe Macedoniate ùssa yakthê'jwe'sx jxukaysatx peeygãhna fxi'ze'. Nawa yakthê'jwe'sxtxi neewe'we'tha'w, i'kwe'sx peeygãani' jwee'fiçxáa ùuste penakahn. ¹¹Kuçx nxus yajkxmée wëtçxáa mfxi'zewe i'kwe'sx mjüsuçxáa pa'pçxuna, ma'wëtka'w neewe'we txã'wë yũuna, ¹²kxah Dxusa's jiimeesawa açewe'wemeetxna, aç'a' i'kwe'sxtxiwa kÿhwa peejiimeena.

Jesukristo' ki' sxawedna kÿjana

¹³Yakthê'jwe'sxtxi kaajiyu'jmée yu' nvxiit wëemeetha'w uusaawe'sx ma'wë yuua'jsatewa, kxah i'kwe'sxwa Dxusna jiimeesa na'wë nxusmeene'kwe. ¹⁴Jesusa' uuçxawa ki' ïtxi yuuni's jiitha'w, txã'wëyçxáa Jesusna jxpa'gaçxa uusaatxi' Dxusa' ki' ïtxi vxitçxa Jesus yakh nuykÿjana sÿju'tha'w.

¹⁵Kxahtha'w i'kwe'sxtxi pta'sxi' Kristo kaapiya'jni's, txã'wë Kristo kÿi ente' kwe'sx nee ïtxi ùssa' uusaawe'sx yaçte pe'jna u'jni yuume'nja'w. ¹⁶Txãa pa'gatey Kristo'fiçxáa cieluju kÿiwa'jsa' seena' jxkaahwa'ja's we'wena, Dxus angeleswe'sx npiiçthê'jwa we'wena, naapkaçxha' Dxus tukani zhiçxkwesawa susuna. Naapkaçxha' Kristona jxpa'gaçxa

uusaawe'sx khuē'y ĩtxi yuutxna. ¹⁷Txajū' nee ĩtxi ũssa' txāawe'sx yakh ja'daçxah pe'jna u'jni yu'nja'w tãaph pxãhte cielute Kristo's puutx uyya'. Txajū' Kristo yakh nes yu'nja'w bagaçxtewa. ¹⁸Kxah na'wē pta'sxni's jiyuçxa', puutx kvxiisxa'jna mfxi'zewe nxusmée.

5 ¹Nawa bagaçx kii ente kiiwa'thewa txāa yu'sa' pta'sxna fxi'jwa'j peejxme' yakhthē'jwe'sxtxi. ²I'kwe'sxa' ew jii i'kwe Kristo' kīh entewa kīhçxáa yūuna yajkxmée ũsiyna, pesweewa ma'wēga kus pxāh yaakxnimeete pa'ja' txā'wēy. ³Nasa we'weçxa': Kīhwa yuumeena, jxuka ewçxáa ũstha'w jīna ũsiyna, txāa dudte Dxus kastigāywa'j ena' pa'jana, u'y nasate aç'açte ma'wē akasa pa'jakx txā'wēy, aç'a' íyuya' ajameetxna. ⁴Nawa Kristo kiiwa'ja's jimée çxhi'dxte yu' ũsmeei'kwe, txāa pa'ga i'kwe'sx jxpa'yakxmée ũsiyna Kristo' kpajkxmeena peswée na'wē. ⁵Txāa pa'gatey i'kwe'sx jxukaysa jiisa eena'tewe'sxi'kwe, kwe'sxa' jiimeesa çxhi'dxte fxi'zesa na'wēsameetha'w. ⁶Txāa pa'ga vxite nasa deesa na'wē fxi'zewa'jsameetha'w, wejxwa ma'wē fxi'zewa'ja'swa jxpa'yakx ũsuga. ⁷Kuççxáa deenisa' aç'a' tūusa' kustewe'sxçxak tūl'. ⁸Nawa kwe'sxa' eena'tewe'sxtha'w na' jxpa'yakx fxi'zega, txāa pa'gatey Dxusa's ũuste peçxkanamée yaakxwa'ja's jxpa'gaçxa peeygāawa'ja'swa ji'ptha'w, sa' ewte neeyūuwa'ja's ũuste ew jiitha'w naa pa'ga. ⁹Dxusa' kwe'sxtxi' kastigāyya' sūhçxa nvxihtme', wejxwa Jesukristo nwe'wete ewte neeyūuwa'ja's ji'phukahnkū txā'wē nvxiht. ¹⁰Txāa pa'gak Jesukristo' kwe'sx pa'gate paa ya'dukhçxa uu, aç'a' açxha' ĩtxi mtha'w yuu meeçxa' uuníi mtha'w yuu nawa bagaçxte yuhwa txāa yakh txuteme'nja'w. ¹¹Txāa pa'ga nxusmée mfxi'zewe. Puutx teeçxsa na'wēçxah kçxhāaçxha'jna na'wē yūuna ũsi'kwe txā'wēçxáa meswe.

Dxus yakh fxi'zesatx Pablo yu'kxpehni

¹²Yakhthē'jwe'sxtxi neewe'weçtha'w i'kwe'sxtxi yu'kxpehna: Dxus yakh fxi'zewa'ja's pu'çxsatxi' ew miipe'jwe. ¹³Txā'wē pu'çxna ũspa'ga txāawe'sxtxi' wala weçxana mpeeygāhwe. Txā'wēy vxitesa yakhwa puutx ewçxáa mfxi'zewe.

¹⁴Na'wē yūuwa'ja'swa neewe'weçtha'w yakhthē'jwe'sxtxi: Mjiiya' wa'lsatx myu'kxpehwe. Dxusna açxamée çxhāçxha yaakxsatxi' mekçxhāaçxha'jwe. Dxusna ew jiimeesatxwa mpu'çxwe. Jxukaysatx peeygāawa'ja's mji'phuwe.

¹⁵Mpa'yajkxwe puutx ewmeeçxáa yūuna fxi'zemée, wejxwa i'kwe'sxa' puutx teeçxsa na'wēçxah ew myūuwe naa kiwete jxukaysa yakh.

¹⁶Bagaçxtewa weçxana wētçxáa mfxi'zewe. ¹⁷Een isa Dxus yakh puutx we'wena mfxi'zewe. ¹⁸Kīh nxus en pa'thewa, Dxusa'sçxáa weçxana meswe, txāa pa'gatey Dxusa' txā'wēk fxi'ze jxthāasu' i'kwe'sx Kristo Jesusa's jxpa'gasatx.

¹⁹Dxus Espiritu's ivxiitunuwe. ²⁰Dxus kaaūusuthe'jni's pta'sxni's weeçxnuwe. ²¹Wala jxpa'yakx pakwena atxahçxa ewsaçxá's mpa'gawe. ²²Kīhwa ewmeesajū yu' jxuka mtxuteewe.

²³Dxus ewte kaafxiz'e'jsa kīh pkał yuhwa jip'hme'e vxitna pa'jana i'kwe'sx kakwe ma'k yuu, i'kwe'sx ũus ma'k yuu, i'kwe'sx yaakxni ma'k yuu nawa jxuka, kxah Jesukristo kīi ente yuwemeesa yuune'kwe.

²⁴I'kwe'sxtxi pa'yasa' īsxiiwa'jsame' na' txā' kxtey yuuna.

Pablo yuwe weçxaa kaahni

²⁵I'kwe'sxa' Dxus yakh meen puutx we'wewe kwe'sx pa'gate.

²⁶Yakhthē'jwe'sx jxukaysatx meen weçxawe Dxusçxáana yajkxna.

²⁷Jesukristo jxkaathe', txā'wē i'kwe'sxtxi neewe'weçthu naa karta's lēeykahn jxukaysa yakhthē'jwe'sx ksxavxYTE.

²⁸Kwe'sxtxi jxpe'jsa Jesukristo' i'kwe'sxtxi pu'çxhina.